

S KUKEL

“Nem araus a bea’ne rokamel ont sòlz; i derbail gea za nemmen der ra’m ont dòra kimm e „ sogt de Rina en sai’ neven.

De Teresa ist van a bail as de bòrtet der doi moment, de ist òlbe gòngen ka de nuna za èssn guata kukeler ont hait ist kemmen der moment za learnen za kochen sa.

De Rina hòt òchsk jor oramae; ont de billt as o’as geat baiter pet en doi prauch, ober de versteat as sai’ net laichta zaitn haizegan to, bo as de mearestn lait gea’ za òrbetn ont za lem en de stòtt vinnen se òlls parotet en de boteig ont gea’ vil vert za èssen aus.

De Teresa hòt 25 jor, de lep ka Persn ont hòt lai 5 jor en tol galep. De hòt zboa schbestern greaser abia sir as lem ka Trea’t ont ka Leive ont kemmen en Tol lai a vòrt en munat ormae. De hoasn Anna ont Maddalena ont de hom schoa’ 2 kinder ver o’as. De sai’ mama ist storm schoa’ vour a por jor van a scheila krònket ont sai’ tata ist òlbe as de òrbet ver za derhòlten de familia.

En de Teresa hòt en òlbe pfòln studiarn, ont sai’ tata hòt en òlbe gahelven ver za gea’envire, de hòt gamòcht de universitet ka Trea’t va birtschòft. De ist noch za suachen an òrbet ont derbai hilft se en de nuna za mòchen a bea’ne mistern ont òllsouvle schlòfft se aa ka sir.

De Rina hòt nou 3 kia en stòll ont de miast sa òll to mèlchen, dòra hòt se a zboa’sk hennen, an schbai’ ont an gròasn òcker pet ano van òlls. Sai’na kinder hom en bel tsòk za long sai’ òlls, as de tat de’na guat lem, ober si bill nèt molarn. De Rina hòt gabellt lem abia doin jor ont hòt nicht gabellt bissn va televisionan oder va aote: de ist nea’ innsting en oa’n.

„ Na, I hòn mer vergèssn de milch, bòrt i gea bider zaruck za gannemen sa, oder bill so mèlchen a bea’ne du Teresa? „ ober de Teresa hòt skòlottert der kopf ont hòt omport gem: „ Na nuna s ist za vill a mia, ont pet en sell tschmòch“... „ Alura parootmer tschirt“ sogt de Rina en de Teresa, as geat schubet za ganemmen de schaitler. S ist pòl um zeichena en de vria gaben ont de sunn hòt u’pfònk za bermen en an schea’n to va oberel.

Af en tisch de nuna hòt parogatet a groasa hòlzena schissel, boaz ont rokamel, der ra'm, a bea'ne sòlz, heivel, eil ont Schubet derno ist se kemmen pet e milch garo gamòlchen.

„Alura vong ber u' mai' kloa'. I lar der drinn en de schissl bos as praucht ont du vòngst u' za knetn“; sogt de Rina „Ober nu'na du boast as s ist s earste vòrt as i koch, i hòn nia probiart“ sogt de neven. De Teresa vòngt u' za kneten bos as gep en de nuna: mel, sòlz, heivel, karbonata; de nuna leart en abia za òrbetn der toag. „Iaz Teresa lòg e der schaug an schekrèt va mai'na kukeler“; de Rina geat en spaikommer ont kimmp zaruck ont lart drinn en de schissl der doi zutat ont mòcht baiter knetn en de Teresa. „Iaz kònst baiter mai'na kukeler kòchen, ober s miast plaim an schekret dòn as du hòst iaz tschechen“. De Teresa gep Schubet omport va jo pet en kopf ont rift za kneten der toag as ist schea' linn.

De Rina nimmt en de hent der toag za schaug bes er rècht ist ont mòcht an groasn „burm“. „Iaz Teresa mòch ber klo'ana balleler ont ber skitzn sa, ont de miasn sai' schea' kuglet. „Schenegual as du hòst de preatlar parogatet, leig sa as de plòtt van heart, ober kontrolliar as s vaier nider ist, sistn tea' se se verprennen ont ber meing òlls en de hennen berven“ sogt de nuna. De Teresa volgt Schubet, hòt kontrolliart s'vaier ont hòt u'pfònk za leing drau de preatler, ober de hòt earst gabòrten as de nuna de earstn drau leicht, asou hòt se stellt pet e ang abia za tea'.

Ben as de sai' pòchen gaben va peada de saitn de nuna leart en abia bichte as ist za loa'nen au de kukeler as de saitn van heart za long sa kualn ont za tea'nea'mer schirn.

„Iaz sai'se parogatet, bar miasn lai bòrtn as de kualn ont dòn mu bar sa kostn“ sogt de nuna „I sech nea'mer de stunn, hòst nou de marmelata va grantn nuna?“ sogt de Teresa ; „Jo, ober ber èssen sa za marennan“ sogt de nuna pet a hoacha stimm.

Za marenan de zboa hom gessn de kukeler pet e marmelata va grantn ont en de Teresa denkt s en, abia de nuna hòt en kontart, van òrman lait van tol as sai' bolten òrm gaben ont as pet bea'ne hom sa a sell a guats proat gamòcht as hòt belten in gahòlten.

S ist de zait za gea'bider hoam, ont de Teresa loade pet en auto griast de nuna as gep en mit a laila pet drinn an pèr kukeler ont lòck s Tol pet a schea'na naranschvòrbega sun.

De Teresa de nòcht ist nèt guat gaben za sperrn an ag, de hòt òlbe tschbunnen van doin kukeler as ist schot as bea'ne lait kennen sa, aa bes de sai' asou guat...

Der to derno ist se gòngen ka sai'schbester Anna, de elteste, ont ben as de ist gòngen aninn va de tir de ist sèm gaben za straitn pet en sai' mònn bavai er hòt nèt gabellt verkaven an òltn stòll en Bersntol: „ Er ist propre af en be, bos billst as ber tea' ont ar ist noch za vòlln haro, za nèt kloffen va de sèll gònze bis za ma'n“ sogt de Anna, zourne; ont ben as de secht de Teresa hòt se se skusart; de Teresa vòngt u' za kòntarn va de òrm nuna as ist òlbe aloa' ont va sai'na guata kukeler ober de Anna pariart za nèt lisen sa belten.

Zobenz hòt der sai' hendi galaitet ont s ist kemmen de nochrìcht as de hat nea' krieg gabellt: de nuna ist storm. De Teresa hòt en nèt klap: de nuna ist s bichteste mentsch ver sir gaben, abia a mama ont hòt en òlls galeart. De hòt u'pfonk za zbinnen van schea'n momentn as de hom zòmm vertrim ont va sai'na kukeler as men hòt nèt leicht vergèssen.

En sèll moment de television ist u'gaben as de nochrìchtn van tol ont de jung hòt gahert as en tol sai'noch za gea' au naia bèrkn va lòntbirtschòft as mòchen kas, milch, marmelata, hu'ne ont en sai'kopf ist en kemmen der peiste vurm ver za denken de sai' nuna: au tea' a tscheft as verkaft bòrma kukeler pet de milch, marmelata ont vlaisch van tol, mòchen aus der Stòll va sai' schboger as ist propre af en be ont as de turistn sechen ben as de kemmen za schaung s kloa' dervl!

De Teresa telefoniart schubet en sai'na schbestern as sai' nèt oa'ne pet sir, as bèrt nea' funktioniern, as de boast as ist nèt leicht en a klo'as dervl, as vil hom en probiart, ober de Teresa glap en birchle vil ont s ist a moglechket aa za gea' bider en tol, glaim ka sai'na lait.

De bochen darno de Teresa probiart vil vert za mòchen an schouber kukeler. An schouber lait van dervl as de hòt pakemmp hom en tsòk as ist nèt leicht as de hòt gamecht suachen an òndra òrbet ober de Teresa hòt nicht galisnt.

De jung gep se bolten za tea' vòngt u' za gea' en de gamoa' ont en an schouber omtn ver za vrong paitroge ont ausrotn ver za tea' au s sai' nai tscheft pet en num: „ S Kukel“. De steat en belten no en de òrbetn bavai de billt as s tscheft hòt aus tschaugt abia an òlts bersntoler haus , gònz va holz ont stoa' pet an groasn heart bou as bern kemmen kocht de kukeler. Zòmm en de kukeler hòt men zòmm gèssn marmelata va grantn oder schbòrzber gamòcht van bèrk van Pero, kas oder speck gamòcht van Luiz oder Hu'ne va de Maria. Òlla de Kukeler gamòcht va de Teresa sai' en vurm va hèrz gaben, abia as sai' de lait en Bersntol.

En moi van jor derno, no an schouber kòrtn de òrbetn sai' garift ont s tcheftl va de Teresa ist paroat za sai'kemmen au'tun ont sai'na schbestern aa tea' zòmm òrbeten en de Teresa.

Der to as de Teresa tuat au s sai' tscheft sai' gaben an schouber lait va de gamoa' ont finz der asesor van turismus va Trea't. S tscheft ist gaben laoter roata pleambler gònz va helz ont stoa' gamòcht. Drinn hòts a por tischer ont an groasn heart ont vour en de tir an schouber pankler, abia as hòt gabelt de Teresa ont zintrest an groasn letrat va sai'nuna as kocht de kukeler.

Der sèll to de Teresa ist belten agitart gaben ont s ist gaben vol va lait: a bea'ne bundrega a bea'ne vroat ober òlla hom gessn de guatn kukeler as hom paroatat de Teresa ont sai'na schbestern za quintai de voudern ta.

De earstn zaitn ist nèt leicht gaben, de lait sai'bea'ne gaben ont s bètter hòt gor nicht gahelven, de plea'der hom stentart za bòcksen ont as de pèrng hòts òlbe bint, schnea ont de turistn sai'net kemmen.

Ober zan an glick ist lai der u'vong gaben, en mittl oberel sai' u'pfonk za kemmen de earstn turist va Trea't as pet en sai' hendi hom letratn van kukeler gamòcht ont sai'kemmen za marenan derno as de sai' ka pèrng gòngen. Speiter sai'kemmen vil taitscha turistn, as hom en vill kompliment gamòcht en de Teresa. En agest s tcheft ist òlbe voll va lait gaben ont a por tag de Teresa ont sai'na schbestern sai' asou mia gaben as de hom tschloven vill vert kann haus va de nuna ont hom sa òll mol gadenkt ont vergèltsgott ver za hom en galeart za kochen de kukeler as iaz sai' va belten lait kennt.